

# Naib Canselor UTHM terima anugerah NLP Coach

**BATU PAHAT** - Universiti Tun Hussein Onn Malaysia (UTHM), mencipta sejarah lagi apabila Naib Canselornya, Profesor Datuk Dr Mohd Noh Dalimin menerima anugerah daripada Kementerian Pengajian Tinggi (KPT).

Penganugerahan Sijil Kejurulatihan Certified Neuro Linguistic Program (NLP) itu, menjadikan Mohd Noh sebagai naib canselor pertama universiti awam (UA) di negara ini menerima anugerah tersebut.

Penolong Pegawai Perhubungan Awam UTHM, Suriyati Baharom berkata, majlis penyampaian anugerah berkenaan disempurnakan Menteri Pengajian Tinggi, Datuk Seri Idris Jusoh.

Program Kejurulatihan Certified NLP adalah projek perintis yang dimulakan sejak 14 September 2015 bagi memenuhi hasrat KPT untuk membangunkan agenda negara, selaras aspirasi Pelan Pembangunan Pendidikan Malaysia (PPPM-Pendidikan Tinggi), seterusnya mendorong kecemerlangan berterusan dalam pembangunan diri rakyat Malaysia khususnya warga pendidikan tinggi.

Jelas Suriyati, NLP adalah satu kaedah hubungan antara proses neurologi (neuro) dan bahasa (linguistik) bagi mengubah pola perilaku melalui program minda bagi mencapai tujuan tertentu yang akan dapat membantu pembangunan diri pegawai melalui tindakan lebih

strategik.

"Metodologi dan teknik NLP difikirkan sesuai serta bermanfaat dalam melaksanakan tugas harian termasuk pelaksanaan proses pengajaran juga pembelajaran.

"Antara matlamat yang telah dijelaskan KPT dalam usaha pengamalan kemahiran NLP ini adalah untuk meningkatkan bilangan penuntut yang mendapat Kelas Pertama berkualiti dan perubahan bangsa yang percaya kepada diri sendiri ke arah 'Khaira Ummah,' katanya dalam satu kenyataan.

Suriyati berkata, ia selaras dalam usaha mendukung perancangan KPT yang mahukan ramai pegawainya dapat melatih dan memberi manfaat kepada kira-kira tiga juta pegawai dan penuntut di seluruh Malaysia.

Sementara itu, Mohd Noh berpendapat program NLP telah membuka minda setiap pegawai yang terlibat dalam usaha memacu warga UTHM ke arah melahirkan kakitangan terbaik pada masa akan datang.



**Mohd Noh (kanan) menerima anugerah NLP Coach 2015 daripada Idris (dua, kiri) yang menjadikan UTHM universiti awam pertama menerima anugerah itu.**